



Sumáriu:

Atividade Parlamentu Nasionál fulan Outubru 2020

Introdusaun

JSMP monitoriza diariamente atividade Parlamentu Nasionál nian. Atividade prinsipál sira Parlamentu Nasionál nian mak reuniaun plenária no Komisaun Espesializada Permanente sira-nian no fiskalizaun ba programa no atividade Governu nian.

Reuniaun plenária hala'o iha Segunda-feira no Tersa-feira, reuniaun Komisaun sira-nian hala'o iha Kuarta-feira no Kinta-feira no fiskalizaun hala'o iha Sesta-feira. Reuniaun plenária, aleinde plenária normál, iha mós plenária extraordinária. Reuniaun plenária extraordinária hala'o ses husi oráriu reuniaun plenária normál nian.

Parlamentu Nasionál iha fulan Outubru nian laran funciona normalmente desde abertura sesaun lejizlativa datoluk iha 15 Setembru 2020. Mezmu nune'e, Parlamentu Nasionál sei nafatin hasoru dezafiu boot ida mak posizaun política bankada opozisaun CNRT ne'ebé la rekoñese legalidade estrutura Meza Parlamentu Nasionál, nune'e mós Governu VIII.

Atividade Parlamentu Nasionál iha fulan Outubru nia laran domina ho debate no aprovasaun ba Proposta Lei Nú. 22/V (3) kona-ba Orsamentu Jerál Estadu (OJE) tinan 2020. Proposta lei ne'e diskute no aprova iha fulan Outubru nia laran.

Reuniaun Plenária

a) Plenária 1 no 2 Outubru 2020

Reuniaun plenária Parlamentu Nasionál 01 no 02 Outubru 2020 tau prioriedade ba diskusaun no aprovasaun ba Proposta Lei Nú. 22/V (3) kona-ba Orsamentu Jerál Estadu (OJE) tinan 2020.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Molok halo diskusaun, deputadu sira sei rona diskursu Primeiru Ministru (PM) nian kona-ba OJE 2020 nian. Primeiru Ministru iha nia diskursu konsidera hateten katak OJE tinan 2020 nian ho montante dolar amerikanu milliaun rihun US\$1,497 atu kobre ba nesesidade husi programa no prioridade nasional sira ne'ebé define ona husi Governu Konstitusionál VIII, liuliu ba nivel estabilizasaun setór sosial no setór ekonómiku, no ba prosesu reforma institusionál sira ne'ebé la'ó hela. Dokumentu ne'e integra mós despeza sira kona-ba resposta ba COVID-19 no ba medida sira rekupersaun ekonómika nian.

Depoizde diskursu PM nian, deputadu sira mós halo intervensaun. Iha intervensaun, deputadu opozisaun husi bankada CNRT konsidera orsamentu ne'ebé VIII Governu Konstituisional VIII apresenta kontra regra duodesimal no konsidera mós katak Governu ne'e la ejiste ona tuir konstituisaun no lei sira. Bankada CNRT mós husu atu hamenus gastus sira la nesesáriu liuliu liga ho orsamentu ba bens serbisu ne'ebé ho nia montante barak tebes no purvolta milliaun 20 resin mak gasta ba selu profesionál sira ne'ebé la nesesáriu no iha indikasaun fahe osan de'it.

Relasiona ho orsamentu ba kapitál minor no kapitál dezvoltamentu nian ne'ebé la urjente, CNRT husu atu tau fila fali ba iha setór sira seluk ne'ebé iha liu nesesidade urjente atu ezejuta iha fulan rua nian laran antes termina tinan 2020 hodi la bele implika ba reapropiasaun ba orsamentu hirak ne'ebé la ezejuta iha orsamentu tinan 2021.

Rejultadu votasaun ba Proposta Lei Nú. 22/V (3) iha jeneralidade aprovalu ho votu afavor 41, kontra 0 no absteisaun 21. Votu absteisaun mai husi deputadu sira bankada CNRT nian.

Totál dotasaun OJE 2020 fahe ba parte sira tuir klasifikasaun ekonómika:

- Saláriu no Vensimentu milliaun US\$206,7
- Bens no Serbisu milliaun US\$499,3
- Transferénsia Públika milliaun US\$568,7
- Kapitál Minor milliaun US\$8,9
- Kapitál Dezenvolvimentu milliaun US\$213,4.

Totál proposta orsamentu ne'ebé deputadu sira hatama hamutuk proposta 51 ne'ebé admitidu atu diskuti iha diskusaun no votasaun iha espesialidade.

b) Plenária 8 Outubru 2020

Iha reuniaun plenária 8 Outubru 2020 nian, Parlamentu Nasionál halo diskusaun no votasaun iha espesialidade no final global ba Proposta Lei OJE 2020. Proposta Lei OJE 2020 ne'e kompostu husi artigu hamutuk 27 no kapitulu 4 ho aneksu 2.

Iha Aneksu I deskreve kona-ba reseita no despeza husi OJE hahú husi Janeiru to'ó Dezembru 2020 ho nia forma sistematizasaun mak hanesan:

- Tabela I Reseita Estimativa ne'ebé kobra husi Órgaun Administrativa Sentráal RAEOA iha tinan 2020.
- Tabela Dotasaun ba OJE ba tinan finanseiru 2020.
- Tabela III Reseita no despeza sira husi Fundu Autónomu ba tinan finanseiru 2020.
- Tabela IV Reseita no despeza global husi Rejiaun Administrativa Espesiál Oekusi-Ambeno ba tinan 2020.

Aneksu II deskreve kona-ba reseita no despeza orsamentu ba Seguransa Sosiál ba tinan 2020 ho nia sistematizasaun iha Tabele I no Tabele II kona-ba totál reseita global ba Fundu Seguransa Sosiál ba klasifikasaun ekonómika nian.

Totál orsamentu inisiál husi proposta ne'ebé Governu inisia hamutuk billiaun US\$1,497.100 ho nia kategoria sira mak hanesan:

- Saláriu no Vensimentu milliaun US\$206,7
- Bens no Serbisu milliaun US\$499,3
- Transferénsia Públika milliaun US\$568,7
- Kapitál Minór milliaun US\$8,9
- Kapitál Dezenvolvimentu milliaun US\$213,4.

Iha diskusaun especialidade hetan aprovasaun ho mudansa liuhusi proposta adisionál no alterasaun sira ne'ebé aprovalu hodi hamenus tiha nia montante inisiál, nune'e nia totál dotasaun finál hamutuk biliaun US\$1,497.04 ne'ebé fahe ba kategoria sira mak hanesan Saláriu no Vensimentu milliaun US\$206.8, Bens no Serbisu milliaun US\$496.7, Transferénsia Públika milliaun US\$571,1, Kapitál Minór milliaun US\$8,9 no Kapitál Dezenvolvimentu milliaun US\$213,4.

Iha debate, husi totál proposta alterasaun 51 ne'ebé deputadu sira propoin, proposta ne'ebé mak pasa hamutuk totál proposta 17, proposta ne'ebé retira hamutuk 16 no proposta ne'ebé la pasa hamutuk 13.

Proposta ne'ebé mak Meza Parlamentu Nasionál la admiti mak propsota refere laiha relevánsia hodi diskuti iha plenária PN. Proposta ho número proposta 5 kona-ba atu hamenus osarsamentu ba viazen estranzeiru husi dotasaun orsamentu bens no serbisu nian ba kategoria viazen estranzeiru ho nia montante orsamentu US\$65.000, proposta labela admiti ba diskusaun ho razaun orsamentu ne'e atu selu divida de'it.

Orsamentu iha tinan 2020 nian barak liu husi bens no serbisu, kapitál minór no kapitál dezenvolvimentu ne'ebé sei uza hodi selu divida ka deve husi tinan 2019 nian ba projetu no sasán hirak ne'ebé iha ona kompromisiu atu selu iha tinan fiskál 2020 nian.

Rejultadu votasaun ba Proposta Lei nu 22/V (3) Kona-ba Orsamentu Jeral Estadu ba tinan 2020 aprovalu ho votu afavór 43, kontra 21 no abstein 1, husi totál deputadu presente na'in 65.

Orsamentu iha setór justisa iha tinan 2020 nian mak hanesan:

Ministériu Justisa

Totál despeza orsamentu Parlamentu Nasionál ba tinan 2020 hamutuk US\$11,609.00 ho nia dotasaun inisiál ba kategoria sira mak hanesan:

- Saláriu Vensimentu US \$4,614.00
- BensSerbisu US\$6,459.00
- Transferénsia Públiku US\$0
- Kapitál Minór US\$343.00
- Kapitál de Desenvolvimentu US\$194.00

Orsamentu ida ne'e nia montante inklui hotu orsamentu husi Defensória Públiku no Sentru Formsaun Juridíka no Judisiáriu Timor-Leste nian.

Tribunál

Totál despeza orsamentu Tribunál ba tinan 2020 hamutuk US\$4,925.00 ho nia dotasaun inisiál ba kategoria sira mak hanesan:

- Saláriu Vensimentu US\$2,941.00
- Bens Serbisu US\$1,984.00
- Transferénsia Públiku US\$0
- Kapitál Minór US\$0
- Kapitál Desenvolvimentu US\$13.00 (orsamentu tama iha Fundu Infraestrutura)

Prokuradoria Jerál Repúblika

Totál despeza orsamentu Prokuradoria Jerál Repúblika ba tinan 2020 hamutuk US\$4,084.00 ho nia dotasaun inisiál ba kategoria sira mak hanesan:

- Saláriu Vensimentu US\$1,904.00
- Bens Serbisu US\$1,609.00
- Transferénsia Públiku US\$0
- Kapitál Minór US\$0
- Kapitál Desenvolvimentu US\$572.00

Defensór Públiku

Totál despeza orsamentu Defensória Públiku ba tinan 2020 hamutuk US\$1,408.00 ho nia dotasaun inisiál ba kategoria sira mak hanesan:

- Saláriu Vensimentu US\$1,271.00
- Bens Serbisu US\$49.000
- Traferénsia Públiku US\$0

- Kapitál Minór US\$0
- Kapitál Desenvolvimento US\$88.000

Sentru Formasaun Jurídika no Juridisiária

Totál despeza orsamentu Sentru Formasaun Jurídika no Judisiáriu ba tinan 2020 hamutuk US\$128.000 ho nia dotasaun inisiál ba kategoria sira mak hanesan:

- Saláriu Vensimentu US\$102.000
- Bens Serbisu US\$27.000
- Transferénsia Públiku US\$0
- Kapitál Minór US\$0
- Kapitál Desenvolvimento US\$0
- Orsamentu iha Fundu Dezenvolvimentu Umanu US\$1,5.00

Komisaun Anti-Korrupsaun

Totál despeza orsamentu Komisaun Anti-Korrupsaun ba tinan 2020 hamutuk US\$1,149.00 ho nia dotasaun inisiál ba kategoria sira mak hanesan:

- Saláriu Vensimentu US\$783.00
- Bens Serbisu US\$362.00
- Transferénsia Públiku US\$0
- Kapitál Minór US\$0
- Kapitál Desenvolvimento US\$0

Sekretáriu Estadu Igualdade no Inkluzoan (SEII)

Totál despeza orsamentu SEII ba tinan 2020 hamutuk US\$960.000 ho nia dotasaun inisiál ba kategoria sira mak hanesan:

- Saláriu Vensimentu US\$430
- Bens Serbisu US\$482.000
- Transferénsia Públiku US\$48.000
- Kapitál Minór US\$0
- Kapitál Desenvolvimento US\$0

Provedoria Direitus Humanus no Justisa (PDHJ)

Totál despeza orsamentu PDHJ ba tinan 2020 hamutuk US\$1,156.00 ho nia dotasaun inisiál ba kategoria sira mak hanesan:

- Saláriu Vensimentu US\$741.00
- Bens Serbisu US\$415.00
- Transferénsia Públiku US\$0
- Kapitál Minór US\$0

- Kapitál Desenvolvimentu US\$0

Polisia Sientífiku Investigasaun Kriminál (PSIK)

Totál despeza orsamentu PSIK ba tinan 2020 hamutuk US\$545.000 ho nia dotasaun inisiál ba kategoria sira mak hanesan:

- Saláriu Vensimentu US\$211.000
- Bens Serbisu US\$334.000
- Transferénsia Públiku US\$0
- Kapitál Minór US\$0
- Kapitál Desenvolvimentu US\$0

c) Plenária 19 Outubru 2020

Plenária 19 Outubru 2020 nian ho nia agenda sira mak hanesan tuir mai ne'e:

Ajenda período antes ordem do dia

- Pedidu Justifikasaun falta husi deputadu Antonio dos Santos "55" no deputadu Leandro Lobato.
- Deklarasaun Polítika Bankada CNRT.
- Intervensaun deputadu sira nian.
- Informasaun no resposta ba preokupsaun deputadu sira nian husi Ministru Asuntu Parlamentár no Komunikasaun.

Ajenda período ordem do dia

- Diskusaun no votasaun ba Projetu Rezolusaun kona-ba Lei Nú. 59/V (3a) - Rekomenda ba Governu adosaun medida prevensaun sira iha kazu infantisidui no abandona bebe no labarik.

Deklarasaun Polítika Bankada CNRT

- Iha deklarasaun Polítika Bankada CNRT kona-ba hodi hatan deklarasaun polítika Fretilin nian ne'ebé kondena CNRT sofre moras *Post Power Syndromes* no iha CNRT nia deklarasaun ne'ebé lee husi deputadu Gabriel Soares konsidera Fretilin mak sofre moras *Post Power Syndromes* ida ne'e.

CNRT konsidera aktu Fretilin halo hadau meja no viabliza Governu da-walu nu'udar meu sira ne'ebé CNRT no mundu konsidera hanesan asaltu poder hodi kontra Konstituisaun no lei sira hodi ba ukun iha viablizasaun Governu VIII ne'e tuir lei la priense rekezitu legál sira.

Intervensaun deputadu sira nian

Iha intervensaun deputadu sira-nian kestiona asuntu importante sira mak kona-ba:

- Husu atu orsamentu Komisaun B nian ne'ebé trata asuntu Negósiu Estranjeiru, Defeza no Segurasa bele halo debate de'it iha plenária PN.

Asuntu Infrestrutura no Eletridade

- Husu mós ba Ministériu Obras Públika atu matan ba facilidade báziku husi funsionáriu EDTL nian iha teritóriu Timor laran tomak.
- Hadi'a liña telefone iha área ka suku sira ne'ebé la hetan asesu ba lina telefone iha Timor laran liu-liu iha suku Uaigae, munispiu Baucau.
- Tau orsamentu ba dada eleteridade ba suku sira ne'ebé seidak hetan asesu ba eletridade iha Postu Administrativa Maubesi, Fatubuiliko, no Ainaro, suku Saburai Postu Administrativu Maliana, Munisípiu Bobonaro no hadi'a fiu EDTL ne'ebé dada de'it iha aieten no bele fo risku ba comunidade iha tempu udan no anin boot iha suku Metagou.
- Hadi'a estrada husi Postu Administrativu Laga ba Baguia, hadi'a estrada Bazartete-Leorema ne'ebé nia kondisaun subida sa'e maka'as no hadi'a estrada iha bairo sira Dili laran ne'ebé estrada nia asesu sei at inklui kanalizasaun bee moos iha Tasi Tolu no fatin sira seluk ne'ebé la hetan asesu ba bee moos.
- Deputadu sira mós husu ministru Obras Públika atu klarfika kompañia ne'ebé iha de'it orden serbisu no la iha kontratu no kontinua halo obra ne'ebé la iha kontratu iha tempu orsamentu duodesimál nian.

Asuntu Edukasaun

- Husu Ministru Eduksaun no ministreu Negósiu Estranjeiru no Kooperasaun atu lori fila estudante sira husi Israel, Filipina, Indonesia no sira seluk tan ne'ebé presiza tulun husi Governu atu lori fila sira mai Timor.
- Deputadu bankada Fretilin konsidera edukasaun sai la di'ak rejultadu husi ukun tinan 10 ne'e Governu la tau prioridade tuir planu ne'ebé sira halo atu tenki tau orsamentu 15% husi OJE kada tinan ba iha orsamentu iha setór edukasaun no realidade iha tinan sira uluk ne'e so menus husi 3% husi osan estadu ne'ebé aloka ba setór edukasaun.
- Deputadu sira mós husu justifikasaun Governu nian kona-ba tanba saida traballadór sira hetan subsídiu no estudante sira labele hetan. No profesor sira husi Munisípiu Ermera no Baukau durante ne'e balun seidak hetan pagamentu retroativu.
- Deputadu sira mós husu atu hadi'a qualidade edukasaun liuhusi hasa'e kapasitasaun ba mestri sira, reforma sistema atendimentu no hadi'a facilidade báziku inklui materiál sira hodi ajuda profesor sira iha facilidade atu hanorin no reforma profesor sira ne'ebé idade ona. Husu mós ba Ministériu Eduksaun atu rezolve profesor kontratadu sira no *part time* sira-nia orsamentu.
- Hadi'a sala eskola sira ne'ebé la iha espasu ona atu uja ba fatin aprendizajen no liu-liu sala eskola Cafe iha Maliana.

Asuntu Saúde:

- Deputadu sira husu ba Ministériu Saúde atu hadi'a facilidade sira iha sentru saúde hotu iha Timor laran liu-liu ligadu ho moru protesauñ iha edifísiu sentru saúde sira iha suku sira ne'ebé la iha.
- Husu ba Ministériu Saúde atu halo pagamentu ba jornalista *front line* sira ne'ebé seidak hetan subsídiu no mós ba ekipa *task force* na'in 29 ne'ebé to'ogora seidak hetan pagamentu subsídiu Covid-19 nian.

Asuntu Agrikultura

- Deputadu sira husu atu hadi'a kanál irigasaun sira ne'ebé agora aat ona hanesan iha parte Watukarbau Minisipiú Vikeke no suku Tekinomata Laga, Baucau no sira seluktan.

d) Plenária 20 Outubru 2020

Parlamentu Nasionál liu husi sesaun plenária ordinária ho agenda governu halo apresentasun planu rekuperasaun ekonómika. Planu ne'e apresenta husi Ministru Prezidénsia konsellu Ministru, Fidelis Leite Magalhães, akompaña ho membru governu balun.

Iha apresentasaun, Ministru Prezidénsia konsellu Ministru hateten planu rekuperasaun ekonómika aprovalu tiha ona no fokaliza liu ba Setores sira hanesan Agrikultura, Turismu, Habitasaun, Edukasaun, Saúde, Protesaun Sosiál no Reforma Institusionál.

Planu ne'e, kombina ho medida ba prazu badak no prazu médiu hamutuk sanulu resin hitu (17), ne'ebé Governu Konstitusionál VIII sei implementa to'og 2023.

Planu ne'e fahe ba etapa rua:

* etapa dahuluk nia objetivu maka atu hamenus impaktu COVID-19 liu husi resposta prazu badak (nomeadamente iha semester daruak 2020),

* etapa daruak ida ho medida sira médiu prazu nian ba rekuperasaun ekonómika (ne'ebé kobre períodu tinan rua to'og tinan tolu).

Faze dahuluk atu evita lakon empregu, apoia família sira no prevene taka empreza sira ho objetivu atu mantein nível konsumu no padraun moris nian.

Medida sira ba prazu badak inklui fahe bote nesiedade bázika (voucher) ho valór \$25 ba kada ema (uza rejistu uma kain), subsídiu rekuperasaun fulan ha'at ba empreza sira ne'ebé rejista lakon rendimentu, no izensaun kontribuisaun sira ba seguransa sosiál.

Prazu naruk, itá nia prioridade política sei habelar objetivu ekonómiku ne'ebé amplu husi programa Governu Konstitusionál VIII nian, atu bele hari dalan kresimentu sustentável nian ne'ebé forte liu no dezenvolvimentu ekitativu.

Iha intervensaun deputadu sira nian, deputadu sira husi governu atu identifika lolos rekuperasaun ekonómika ida oinsá mak atu implementa ba futuru; Presiza halo pagamentu ba subsidiu COVID-19 ba comunidade sira ne'ebé seidak simu; Meius oinsá atu distribui apoio Sexta Bazika ninian ba kada sidadaun no informasaun importante sira seluk liga ho rekuperasaun ekonómika ne'ebé apresenta husi governu.

Sesaun plenária ne'e prezide husi Prezidente Parlamentu Nasionál, Aniceto Longinhos Guterres Lopes, akompaña husi membru meza sira no marka prezensa husi Ministru Prezidénsia konsellu Ministru, Fidelis Leite Magalhães, Ministru Assuntu Parlamentares no Komunikaun, Francisco Jerónimo no mós membru Governu balun.

e) Plenária 26 Outubru 2020

Parlamnetu Nasional iha 26 Outubru 2020 halo reuniaun plenária ho ajenda diskusaun mak hanesan tuir mai ne'e:

Ajenda Período Antes Ordem do Dia

- Karta pedidu justifikasaun falta husi deputadu Arão Noe no deputadu Oscar de Araujo.
- Karta informasaun husi Prezidente Repúblika kona-ba feriadu anuál Prezidente Repúblika nian ba tinan 2020.
- Deklarasaun polítika Bankada Fretilin hodi hatan deklarasaun politik CNRT nian kona-ba Post Power Syndrome.
- Intervensaun deputadu sira nian.

Ajenda Período Ordem do Dia

- Anúnsia no Baixa ba Komisaun Finansas Públika Proposta Lei Nú. 23/V (3) kona-ba Orsamentu Jerál Estadu ba tinan 2021.
- Diskusaun no votasaun ba Projetu Rezolusaun kona-ba Lei Nú. 59/V (3a) - Rekomenda ba Governu adosaun medida prevensaun sira ba iha kazu infantisídiu no abandona bebé no labarik.

Deklarasaun Polítika Bankada

Iha deklarsaun polítika husi bankada Fretilin nian hodi hatan deklarasaun polítika CNRT nian kona-ba *Post Power Syndrome* hodi konsidera partidu CNRT mak sofre moras ida ne'e tanba ukun la hotu no la iha kualidade hodi durante tinan 10 ukun gasta osan povu no la rezolve povu nia nesesidade báziku sira hanesan bee moos no saniamentu báziku, saúde, edukasaun, estrada iha área rural, produsaun agrikola menus no seluktan.

Intervensaun deputadu sira nian

- Deputada Olinda bolu antensaun ba deputadu koaligasaun Governu nian atu hatudu ezemplu di'ak hodi tama plenária tuir oras serbisu plenária no la haree ba deputadu opozisaun hodi nune'e bele aselera agenda diskusaun sira la'õ tuir oráriu normál.
- Deputadu Assanami husu ba Governu atu tau matan ba suku Sananain hodi hadi'a fasilidade eduksaun, saude no irigasaun ne'ebé mak aat.
- Deputada Lita Sarmiento husu ba Governu atu hadi'a estrada no eletisidade ba comunidade sira iha suku Biqueli no Makadade, Postu Administrativu Atauro.
- Deputadu sira seluk mós husu atu Governu hadi'a bee dalan no mós ponte sira ne'ebé aat iha Dili laran no Munisípiu sira no aselera konstrusaun ba projetu halo ponte sira ne'ebé seidauk remata atu aselara prosesu hadi'a no tenke ho qualidade.
- Deputadu Abel Pires dala barak ona kestiona prosesu justisa ba matebian Sr. Administrador postu Zumalai ne'ebé to'õ agora nia prosesu seidauk hala'õ no andamentu ba prosesu la iha.
- Husu Governu atu rezolve profesor kontratadu ba sai profesor permanente iha Timor laran tomak hodi evita protestu no halo pagamentu saláriu retroativu ba profesor sira.

Baixa Proposta Orsamentu Estadu 2021

Parlamentu Nasionál ofisialmente halo anúnsia no baixa Komisaun Finansas Públika Proposta Lei Nú. 23/V (3) Orsamentu Jerál Estadu ba tinan 2021.

Total porposta orsamentu estadu ba tinan 2021 ne'ebé Governu propoin hamutuk biliaun US\$1.797.243 ho nia kategoria sira mak hanesan:

- Saláriu no Vensimentu US\$228,2
- Beins no Servisu US\$397,3
- Transferénsia Públika US\$694,9
- Kapitál Minór US\$58.8
- Kapitál Dezenvolvimentu US\$417.7

Orsamentu Jerál Estadu 2021 ne'e kompostu husi Orsamentu Administrasaun Sentrá, Orsamentu Rejiaun Administrativa Espesiál Oekusi Ambenu no Orsamentu ba Seguransa Sosiál nian.

Orsamentu tinan ne'e apresenta nia metodolójika no tabela orsamentu sei bazeia de'it ba programa nu'udar meu ida atu hakbesik an ba prátika orsamentál internasionál sira ne'ebé di'ak liu, hodi hadi'a qualidade konsetuál no hodi aumenta ninia transparénsia.

Diskusaun no votasaun rezolusuan kona-ba medida sira prevensaun kazu infatisidui, bebé no abandona labarik

Iha diskusaun ba Projetu Rezolusaun ne'e deputadu proponenti sira iha sira nia justifikasaun konsidera rezolusaun ne'e importante atu bolu atensaun ba Governu no setór justisa hodi tau atensaun máximu ba kazu soe bebé no abandona labarik.

Vise-presidente Parlamentu Nasionál deputada Maria Angelina Lopes Sarmento iha nia justifikasaun ba projetu rezolusuan ne'e apresenta faktu sira husi númeru estatística kazu sira ne'ebé JSMP monitoza ligadu ho kazu soe ka oho bebé no kazu abandona labarik sira ne'ebé rejista no prosesu iha tribunál.

Deputada ne'e realsa tan katak kazu sira ne'ebé JSMP apresenta hatudu númeru aas no sériu tebes ba Parlamentu atu haree no rekomenda ba entidade hotu tau antesaun, liuliu Governu atu halo polítika ida ne'ebé sériu hodi halo prevensaun ba kazu hirak ne'e iha Timor laran.

Deputadu proponete sira seluk mós apoiu katak persiza halo duni rezolusaun ne'e atu hetan aprovasaun hodi bolu atensaun ba Governu, liuliu Ministériu Eduksaun no parte justisa nian, inklui inan aman atu hola medida prevensaun ne'ebé partisipativa no ativa iha eduksaun seksuál hodi bele evita kazu sira ne'e labele akontese tan.

Projetu rezolusaun Nu. 59/V(3a) deputadu sira la konsege halo votasaun hodi aprova tanba la priense kuórum ba deliberaun nian no tanba ne'e deputadu sira adia ba 27 Outubru 2020

f) Plenária 27 Outubru 2020

Parlamentu Nasionál iha 27 Outubru halo reuniaun plenária ordinária ho nia agenda diskusaun mak hanesan tuir mai:

- Diskusaun no votasaun ba pedidu Prezidente Repúblika kona-ba autorizasaun extensaun ba renovasaun Estadu Emerjénsia ba territóriu nasional Timor-Leste.

Primeiru Ministru (PM) Taur Matan Ruak iha nia diskursu haktuir katak surtu Covid-19 nu'udar surtu ida ne'ebé fô emeasa ba ema tomak iha mundu tanba ne'e presiza tebes estadu tomak nia atensaun atu kombate no extensaun ba estadu emerjénsia nu'udar meu importante tanba tuir xefe Governu katak "*Mais vale prevenir do que remediar*".

PM mós konsidera tinan 2020 nu'udar tinan covid-19 nian ne'ebé prejudika ekonomia nasaun tomak iha mundu inklui Timor-Leste ne'ebé afeta aspeitu hotu no tuir rejime jurídiku prevensaun covid nian so bele aplika ho rigór iha sosiedade bainhira iha aplika Estadu Emerjénsia hodi responde ba situsaun kalamidade ruma ne'ebé nasaun hasoru.

Iha intervensaun Bakanda CNRT nian, konsidera aplikasaun Estadu Emerjénsia hanesan menstrusaun tanba ne'e sira rekomenda atu labele kontinua akontese aktu hanesan tanba la iha serteza ba finalidade surtu Covid-19 nian iha médiu no longo prazu. CNRT propoin atu Prezidente Repúblika promulga Lei Protesaun Sivil ne'ebé bele fasilita Governu halo deklarasaun Emerjénsia hasoru situasaun kalamidade ruma bainhira presiza.

Deputadu CRNT mós halo protestu hodi *walk out* husi diskusaun no votasaun ba Extensaun Estadu Emerjénsia tanba la hetan oportunidade husi Meza Prezidente PN atu halo intervensaun no CNRT hela de'it Prezidenti bankada CNRT deputadu Duarte Nunes mak akompañia diskusaun ne'e.

Entertantu husi bankada partidu polítika sira seluk hanesan Fretilin, PLP, PD, KHUNTO, UDT, PUDD no FM agradese ba esforsu Governu nian durante ne'e hodi halo prevensaun ho di'ak no la iha ema ida mak hetan transmisaun lokál no mate no deputadu sira ne'e kontinua fó apoiu ba implementasaun Estadu Emerjénsia da-7 nu'udar mesu ida atu halo prevensaun ba pandemia covid-19.

Deputadu sira mós konsidera katak númeru Covid-19 nasaun sira komesa sa'e as inklui nasaun viziñu hanesan Indonesia no dalan úniku Timor-Leste nian mak halo prevensaun antes duke kura tanba Timor-Leste frazil tebes kuandu ita husik no bele iha kontaminasaun lokál ida lais tanba ita la iha facilidade no medikamentu ne'ebé adekuadu.

Deputadu sira mós husu atu PNTL tenki halo vizilánsia máximu iha fronteira liu-liu iha tempu besik finadu bele iha infiltrasaun ba mai husi comunidade iha fronteira terrestre nian. No deputadu sira mós ejije atu halo pagamentu ba reklamadu, *fronline* no aselera subsídiu nesiedade ka programa sesta báziku nian ba comunidade.

No seluk mak deputadu sira husu atu hadia ekonomia rai laran iha tempu surtu ida ne'e liu-liu apoiu ba industria ki'ik, médiu no boot sira liuhusi banku estadu nian ho orsamentu estadu nian hodi ajuda hadi'a setór privadu no loke kampu serbisu ba joven no comunidade sira iha Timor-Leste. Nune'e mós estadu ka governu labele trava nia comunidade ka ema sira ne'ebé atu ba hala'o serbisu iha rai li'ur hanesan Englatera no seluktan hodi apoiu ekonomia familia iha tempu pandemia ida ne'e.

Primeiru Ministru iha nia intervensaun ikus hato'o agradese barak ba entidade hotu-hotu liu-liu votande di'ak husi deputadu Parlamentu Nasionál no Prezidente Repúblika nia apoiu tomak atu bele kontinua fó apoiu ba serbisu Governu VIII nian iha implementasaun estadu emerjénsia sira.

Rejultadu votasaun ba pedidu extensaun Estadu Emerjénsia liuhusi projetu Lei Nú. 12/V (3a) kona-ba Autorizasaun Renovasaun Estadu Emerjénsia ba da-7 pasa ho votu afavór 42, kontra 0 no abstein 0, husi totól deputadu na'in 43.

g) Plenária extra-ordinária 28 Outubru 2020

Parlamentu Nasionál iha 28 Novembru 2020 hala'o reuniaun plenária estraordinária ho agenda diskusaun mak hanesan tuir mai ne'e:

- Diskusaun no aprovasaun ba projetu rezolusaun kona-ba Rekomendasaun ba Governu atu opta medida sira prevensaun ba kazu infantisidiu, abandona bebe no labarik.

- Diskusaun no aprovasaun ba projetu rezolusaun kona-ba Atribuisaun Nasionalidade Timorens ba Sr. Nugroho Katjasungkana tanba nia prestasaun serbisu nu'udar ativista Timor Leste ba ukun rasik an.

Projetu rezolusaun nu. 59/V (3a) kona-ba rekomendasaun sira ba Governu atu adopta medida prevensaun sira iha kazu infantisídiu no abandona bebe no labarik, projetu ne'e la iha diskusaun no submete liu ba votasaun.

Rejultadu votasaun ba projetu rezolusaun kona-ba medida prevensaun sira iha kazu infantisídiu no abandona bebe no labarik ne'e aprovalu ho votu sira unamidade husi total deputadu prezenti nain 38 mak hanesan votu afavór 38, kontra 0 no asbtein 0.

Enkuantu ajenda diskusaun no aprovasaun ba projetu rezolusaun kona-ba Atribuisaun Nasionalidade Timorens ba Sr. Nugroho Katjasungkana tanba nia prestasaun serbisu nu'udar ativista Timor Leste ba ukun rasik an. Adia ba tempu tuir mai tanba tuir proponenti husi Sr. Mariano Assanami Sabino Lopes haktuir katak projetu ne'e nia dadus elaboradu seidak kompleitu.

Iha parte seluk tuir deputada Carmelita Caetano Moniz husu ba iha meza atu baixa projetu rezolusaun ne'e tuir prosedimentu normal ba komisaun A atu halo apresisaun molok submete ba plenária atu diskuti fila-fali.

Reuniuan Komisaun A

JSMP iha fulan Outubru nia laran halo monitorizasaun ba reuniaun Komisaun A Parlamentu Nasionál hamutuk dala 4 ho ajenda reuniaun sira mak hanesan mensiona tuir mai ne'e:

1. Kuarta-feira 14 Outubru mak:
 - Reapresia levantamentu imunidade deputada Sra. Olinda Guterres hodi presta deklarasaun iha Tribunál distritál nu'udar testemuña.
 - Apresisaun Komisaun A kona-ba ezekusaun serbisu ba Covid-19.
2. Kinta-feira 15 Outubru mak:
 - Halo apresiasaun ba keixa sira husi comunidade.
 - Apresisaun relatóriu paraser Komisaun A nian kona-ba ezekusaun Estadu Emerjénsia.
3. Kinta-feira 21 Outubru mak:
 - Halo apresiasaun ba keixa sira husi comunidade.
 - Continua halo diskusaun no halo apresiasaun ba relatóriu paraser Komisaun A nian kona-ba ezekusaun Estadu Emerjénsia.
 - Aprovasaun kalenderizasaun ba konsulta públiku Komisaun A kona-ba Lei Eleisaun Munisipál no mós Lei Podér Lokal no Desentralizasaun Administrativa.

4. Kinta-feira 22 Outubru mak:

- Aprovasaun ba relatóriu paraser Komisaun A kona-ba ezelesaun Estadu Emerjénsia.

Konkluzaan no rekomendasaan

Parlamentu Nasionál iha inisia sesaun lejizlativa datoluk nian hatudu vontade no serbisu di'ak ba hala'o nia knaar no kompeténsia konstitusionál sira iha halo lei, fiskalizaun no foti desizaun polítika. Dezentendimentu polítika entre bankada sira ne'ebé kaer ukun no bankada partidu opozisaun CNRT sai hanesan dezafiu boot ba funksionamentu no efektividade serbisu Parlamentu Nasionál nian.

Nune'e, JSMP rekomenda atu Parlamentu Nasionál atu tau interese povu no nasaun nian aas liu duke interese partidária atu bankada parlamentár hothotu bele kontribui ba funksionamentu normal no efetiva Parlamentu nian. Nune'e, Parlamentu Nasionál iha sesaun lejizlativa ida ne'e bele konsentra ba diskute no aprova lei importante sira ne'ebé pendente hela.